

## Evening Dogri (NSD) Bulletin 31-07-2025

### आकाशवाणी

#### खबरां ----

1. कैबिनेट नै प्रधानमंत्री किसान संपदा योजना आस्तै 6 जहार 520 करोड़ रपे दे बजट खाके गी दित्ती मंजूरी।
2. डंड रौली करिए अज्ज संसद दे दौनें सदनें दा कम्मकाज पूरे दिन आस्तै स्थगित कीता गेआ।
3. चुनांस आयोग नै उपराश्ट्रपति चुनांस लेई निर्वाचक मंडल दी सूचि गी खीरी रूप दित्ता।
4. जनजातीय ग्राएं गी गोद लैने पर राश्ट्रपति द्रोपदी मुर्मू होरें एम्स देओघर दी प्रशंसा कीती, बेहतर प्राथमिक सेहत सेवा ते स्वास्थ सुविधां तोड़ी पुज्ज होग सखल्ली।
5. सोथबी नै भगवान बुद्ध दे जेवर दे अवशेष 127 ब'रे मगरा भारत गी मोडे।
6. मौसम विभाग नै केरल ते लक्ष्यद्वीप दे कंडे दे कन्नै तेज तूफानी अंधी झक्खड़ झुल्लने दी चेतावनी दित्ती ऐ।



#### Cabinet-Meet

कैबिनेट नै कुल 6 जहार 520 करोड़ रपे दे बजट दे खाके गी मंजूरी दित्ती। एहदे च चला'रदी केंद्री प्रायोजित स्कीम प्रधानमंत्री किसान संपदा योजना आस्तै बाद्दू 1 जहार 920 करोड़ रपे बी मंजूर कीते गए। नमी दिल्ली च मीडिया गी जानकारी दिंदे होई सूचना ते प्रसारण मंत्री अश्विनी वैष्णव होरें आखेआ जे इस मंजूरी च मल्टी प्रोडक्टर फूड इरीगेशन यूनिट्स बहु उत्पाद खाद्य विकिरण इकाइएं दी स्थापना गी सहयोग दे तौरा पर 1 जहार करोड़ रपे बी शामिल ना। एहदे तैहत 100 खाद्य पदार्थें दी

गुणवत्ता जांच प्रयोगशाला बी स्थापित कीतियां जांगन। एह प्रयोगशाला Food safety and quality assurance infrastructure खाद्य सुरक्षा ते गुणवत्ता आश्वासन बुनियादी ढांचा FSQAI थमां मान्यता प्राप्त होंगन।

<><><><><><>

### Parl-Adjourned

संसद दे दौनें सदनें दी कार्यवाही बिहार च मतदाता सूचिएं दी विशेष नजरसानी आहले मामले पर विपक्षी पार्टिएं दे शोर-शराबे करी बार-बार स्थगित करनी पेई। लोकसभा दी कार्यवाही 2 बारी ते राज्यसभा दी कार्यवाही त्रै बारी स्थगित कीती गेई। लोकसभा दी कार्यवाही जिस्सलै स्थगन मगरा 4 बजे परतिए शुरू होई तां परतिए शोर-शराबा शुरू होई गेआ जेदे बाद सदन दी कार्यवाही गी दिन भरै लेई स्थगित करी दित्ता गेआ। इयै नेहा शोर-शराबा राज्यसभा च बी दिक्खने गी लब्बा। कार्यवाही गी साड्डे 4 बजे लेई स्थगित कीता गेआ जिसलै कार्यवाही परतिए शुरू होई तां कम्मकाज गी अगगे चलाने दी कोश्ट कीती गेई पर शोर-शराबा जारी रेआ ते सदन गी दिन भरै लेई स्थगित करी दित्ता गेआ।

<><><><><><>

### Malegaon-Blasts

मुम्बई च खास एनआईए अदालत नै 2008 मालेगांव ब्लास्ट दे सारे आरोपिएं गी बरी करी दित्ता ऐ। इन्दे च सांसद प्रज्ञा ठाकुर नै लेफ्टिनेंट कर्नल प्रसाद पुरोहित ते दुए शामिल ना। 29 सितंबर 2008 च इक विस्फोटक उपकरण दे फट्टने करी 6 लोक मारे गे ते किश घायल होई गए हे। एह घटना नासिक दे मालेगांव च इस मस्जिद कोल होई ही। 2011 च राश्ट्री जांच एजेन्सी नै केस अपने हत्थ च लैता। तोआई, बीजेपी नै अदालत दे फैसले दा स्वागत कीता ऐ। नमीं दिल्ली च इक प्रैस वार्ता गी संबोधित करदे होई पार्टी सांसद, रविशंकर प्रसाद हारें इस दिन गी ऐतिहासिक आखेआ। उनें कांग्रेस पार्टी पर

गलत इल्जामें दा षडयंत्र करने दा आरोप लाया। प्रसाद होरें आरोप लाया जे एह सारा षडयंत्र इकरणीति तैहत कीता गेआ जेदा मकसद वोट बैंक हासल करना हा।

<><><><><><>

## Padam-Awards

पद्म पुरस्कारें लेई नामांकन ते सफारशें दी खीरी तरीक 15 अगस्त तोहड़ी बधाई दित्ती गेई ऐ। पुरस्कारें लेई नामांकन छडे राश्ट्री पुरस्कार पोर्टल पर ऑनलाइन हासल कीते जाडन। बरे 2026 लेई पद्म पुरस्कारें दा ऐलान गणतंत्र दिवस, 2026 दे मौके उप्पर कीता जाहगा। एकडे पुरस्कारें च - पद्म विभूषण, पद्म भूषण ते पद्म श्री पुरस्कार शामिल ना। एह पुरस्कार विशिष्ट कम्में गी मान्यता प्रदान करने लेई सब्भनें खेत्तरें ते विशें च विशिष्ट ते असाधारण उपलब्धियें सने सेवा लेई दित्ता जं'दा ऐ।

<><><><><><>

## NEET-PG-2025

मेडिकल साईंस मतल्लक स्तेहानें आहले राश्ट्री बोर्ड- एन.बी.ई.एम.एस. नै नीट पीजी-2025 दे स्तेहान लेई दाखला कार्ड अधिकारिक तौर पर जारी करी दित्ते ना। इस स्तेहान लेई अपने नांस दर्ज करोआने आहले मेदवार, बोर्ड दी अधिकारिक वैबसाईट [nbe.edu.in](http://nbe.edu.in) पर जाइयै अपने दाखला कार्ड डाउनलोड करी सकदे ना। नीट पीजी 2025 दा स्तेहान औंदी 3 अगस्त गी लैता जाना मुकरर कीता गेदा ऐ। मेदवारें गी लोडचदा ऐ जे ओह अधिकारिक वैबसाईट पर जाइयै 'एन्ट्रेंस एग्जैमिनेशन' आहली सैक्शन तैहत नीट-पीजी 2025 पर जाइयै अपने लॉग-इन मतल्लक ब्यौरे दर्ज करियै दाखला कार्ड डाउनलोड करी सकदे ना।

<><><><><><>

## ECI-VP Poll

निर्वाचन आयोग नै उपराष्ट्रपति चुनाव आस्तै निर्वाचक मंडल दी सूची गी अंतिम रूप देई दित्ता ऐ। उपराष्ट्रपति चुनाव दे निर्वाचक मंडल च राज्यसभा च निर्वाचित ते मनोनीत सदस्य ते लोकसभा च निर्वाचित सदस्य शामिल न। आयोग गी निर्वाचक मंडल दे सदस्यों दी नवीनतम सूची तैयार करने दा दायित्व ऐ। निर्वाचन आयोग नै आखेआ जे एह सूची आधिकारिक अधिसूचना दे बाद निर्वाचन आयोग दे काउंटर पर उपलब्ध होगा। संविधान दे अनुच्छेद 324 मूजब भारत दे उपराष्ट्रपति का चुनाव कराने दा दायित्व निर्वाचन आयोग दा ऐ।

<><><><><><>

### **Jharkhand-Prez. AIIMS**

राष्ट्रपति द्रौपदी मुर्मू होरें 5 जनजातीय ग्राएं गी गोद लैने आस्तै एम्स देओघर दी प्रशंसा कीती। स्थापना दे 6 ब'रें दे अंदर गै एम्स इनें ग्राएं दे लोकें तोड़ी प्राथमिक सेहत सेवां पुजा'रदा ऐं राष्ट्रपति मुर्मू होर एम्स देओघर दे पहले दीक्षांत समारोह च मुख्ख परौहने दे तौर पर शामिल होइयां। उनें एम्स देओघर गी सेंटर ऑफ कम्पीटीशन फॉर ट्राइबल हेल्थ यानि जनजातीय सेहत आस्तै बेहतरिन केंद्र बनने आसतै सराहेया। उनें आखेआ जे इस संस्थान नै बाकिएं आस्तै मिसाल कायम कीती ऐ। जेत्तुएं ते टापर्स गी सम्मानित करदे होई राष्ट्रपति होरें खुशी जाहिर कीती ते इन्दे चा 50 फीसदी शा मतियां कुड़ियां हियां।

<><><><><><>

### **Par-Goyal US Tarrif**

केंद्री उद्योग ते वाणिज्य मंत्री पीयूष गोयल होरें आखेआ ऐ जे सरकार हाल च गे घोषित भारी चीजें पर 25 फीसदी अमरीकी टैक्स दी मुश्कलें दा जायजा लैरदी ऐ। लोकसभा च इस बारै बयान दिंदे होई गोयल होरें आखेआ जे देश राष्ट्रहितें दी रक्षा करने आस्तै हर कदम चुक्कोग ते कन्नै गै हितधारकें-करसान, उद्यमिं ते उद्योग इकाइएं कन्नै बी सलाह मिश्वरा कीता जाग। उनें दस्सेआ जे भारत ते अमरीका बश्कार साफ, संतुलित ते दपक्खी फायदें आहले बपार गी लेइयै गल्लबात चला'रदी ऐ। उनें

दस्सेआ जे भारत नै अरब अमीरात, बरतानिया, आस्ट्रेलिया ते दुए राष्ट्रें कन्नै फायदे आहले दपक्खी बपार समझौते गी अंतिम रूप देई दित्ता ऐ।

<><><><><><>

### RSS-Pramukh

साबका राष्ट्रीय सेविका समिति प्रमुख संचालिका प्रमिला मेघे हुंदा अज्ज बडुलै नागपुर च काल होई गेआ। ओहू 97 बरें दियां हियां। उंदा खीरी संस्कार कल बडुलै नागपुर च होग। राष्ट्री स्वयंसेवक संघ प्रमुख डॉ. मोहन भागवत होरें इ'नेंगी देवी अहिल्या मंदिर नागपुर च श्रद्धांजलि भेंट कीती ते उन्दे काल पर दुख जाहिर कीता। मीडिया कन्नै गल्लबात करदे होई डॉ. भागवत होरें आखेआ जे प्रमिला मेघे होरें समिति आस्तै अनथक कम्म कीता। मुख्मन्त्री देवेन्द्र फडणवीस ते केंद्री मंत्री होरें बी सोशल मीडिया पोस्ट च उंदी मौत पर दुख जाहिर कीता। प्रमिला मेघे होरें राष्ट्री सेविका समिति दी मुख्य कार्यकारी दे तौर पर 1978 थमां 2003 तोड़ी अपनी सेवां दित्तियां।

<><><><><><>

### Mumbai-Blasts

प्रवर्तन निदेशालय नै अज्ज मुम्बई दी करीब 8 थाहरें पर मीठी नहर थमां गाद कडुने सरबंधी घोटाले दे सरबंध च छापे मारे। एहू छापे उनें ठेकेदारें दे परिसर च मारे गए जिंदे पर ब्रिहानमुम्बई म्युनिसिपल कार्पोरेशन च गलत समझौता पत्र जमा कराने दा दोष ऐ। प्रवर्तन निदेशालय दे सूत्रें दस्सेआ जे इनें छापें दा मकसद पैसे दे लैन-देन च होई दी धांधली कन्नै जुडे दे दस्तावेज कट्टे करना हा। इनें ठेकेदारें दा आखना ऐ जे उनें पूरे नियमें दी पालमा कीती ऐ पर इन्दे पर सेही तरीके कन्नै कम्म नेई करने जा सामग्री दे गलत आंकलन दा आरोप लाया जा'रदा ऐ।

<><><><><><>

## Buddha's Remain

निलामी संस्थान सोथबी नै भगवा बुद्ध हुंदे अवशेषें कन्नै जुड़े दे पवित्तर गहने भारत गी वापिस देई दित्ते। मुम्बई स्थित उद्योग घर गोदरेज इंडस्ट्रीज ग्रुप नै एह उपलब्धि हासल कीती ऐ। सोथबी दा आखना ऐ जे एह वापसी दा एहसास खुशी भरेआ हा जेडा 2 म्हीने दी गल्लबात मगरा मुमकिन होई पाया। एह अवशेष हुन भारत च स्थाई तौर पर लोके दे दिक्खने आस्तै उपलब्ध रौहडन। प्रधानमंत्री नरेंद्र मोदी होरें बुधवारें इस वापसी दी घोषणा कीती ही जे इसी मान्नै आहली ते खुशी दी घड़ी दस्सेआ। उनें इसी देश दी सांस्कृतिक विरासत दी जित्त आखेआ। उनें जोड़ेआ जे एह अवशेष 127 बरें मगरा घर परतोआ'रदे न।

<><><><><><>

## Weather

मौसम विभाग नै अज्ज असम ते मेघालय च मौलेधार बरखा दी पेशनगोई कीती ऐं विभाग नै अगले 6 थमां 7 दिनें तगर पूर्वोत्तर भारत च तेज बरखा दा ओरेंज अलर्ट जारी कीता ऐ। तोआई, राजस्थान+ च बी अज्ज भारी बरखा दा ओरेंज अलर्ट जारी कीता ऐ। आकाशवाणी समाचार कन्नै गल्लबात करदे होई मौसम विभाग दे वरिष्ठ वैज्ञानिक आर.के जेनामणि होरें आखेआ जे आने आहले दिनें च पूर्वोत्तर क्षेत्र च बरखा तेज होने दी मेद ऐ जदके राजस्थान ते मध्य प्रदेश च कल थमां बरखा च बड़ी मती कमी आई ऐ। मौसम विभाग नै केरल ते लक्षद्वीप दे तटें पर तेज ब्हा चलने दी चेतावनी जारी कीती ऐ। ब्हा दी रफ्तार 45 थमां 50 किलोमीटर प्रति घंटे तगर होने दी मेद ऐ ते एहदे करीब 60 किलोमीटर प्रति घंटे तगर पुज्जने दी बी मेद ऐ। तोआई, इस ब'रे असम च 42 प्रतिशत घट्ट बरखा होई ऐ ते खरीफ मौसम दरान 27 जिलें च सौक्के दी स्थिति बनी गेदी ऐ।

<><><><><><>

## CM Travel Fair

मुख्यमंत्री उमर अब्दुल्ला ते गुजरात दे सैलसफा मंत्री मुल्लेभाई भेरा होरें अहमदाबाद च ट्रैवल एंड टूरिजम फेयर दा उद्घाटन कीता। एहदे च जम्मू-कश्मीर दी समृद्ध सांस्कृतिक विरासत गी दर्शाया जा' रदा ऐ। इस मौके पर मुख्यमंत्री हुंदे सलाहकार नासिर असलम वाणी, विधायक पहलगाम ते विधायक गुलमर्ग बी उन्दे कन्नै मौजूद हे। इस मौके पर बोलदे होई उमर अब्दुल्ला होरें ट्रैवलर्स गी जम्मू-कश्मीर औने दा साद्दा दित्ता ते उनेंगी उत्थुआं दी सुंदरता, संस्कृति ते मेमानबाजी गी अनुभव करने लेई गलाया।



## Amaranth-Yatri Resumes

अमरनाथ जी दी जात्तरा बालटाल आहले रस्ते राएं बहाल होई गई ऐ। इस जात्तरा गी भारी बरखा करी स्थगित कीता गेआ हा। उआं पहलगाम आहले रस्ते राएं जात्तरा अजें बी बंद ऐ की जे रस्ते दी मरम्मत आहला कम्म जारी ऐ। बुधवारें एह जात्तरा दौनें रस्ते राएं स्थगित कीती गई ही की जे घाटी च भारी बरखा होई ही। महाराष्ट्र थमां श्री अमरनाथ जी दी जात्तरा पर आए दे श्रद्धालु विवेक नै अपने अनुभव सांझा कीते ते सुरक्षा, साफ-सफाई ते लंगर सुविधा दी सिफत कीती।



## LG-Amarnath-4 lack Yatra

उपराज्यपाल मनोज सिन्हा होरें श्री अमरनाथ जी दी गुफा च मत्था टेकने आहले श्रद्धालुएं दा आंकड़ा 4 लक्ख गी पार करी जाने पर खुशी जाहिर कीती ते इस जात्तरा दे इंतजामें कन्नै जुडे दे सारे सरबंधी धड़ें गी मुबारकबाद दित्ती। उपराज्यपाल होरें सोशल मीडिया दी इक पोस्ट च लिखेआ जे बाबा अमरनाथ होरें असमभव गी संभव करी दित्ता ऐ। उपराज्यपाल होरें आखेआ जे भगवान शिव नै

करिश्मा करिए दस्सेआ। सब्बनें सरबंधी धडें गी जेडे बी इस जात्तरा दे इंतजामें गी दिक्ख'रदे न, दा धन्नवाद कीता जिनें श्रद्धालुएं लेई इसी खास अनुभव बनाया। इस जात्तरा लेई दुनिया ते मुल्ख भरै थमां श्रद्धालु आए। एहू सब्ब भारत दी एकता, अखंडता ते चुनौतिएं थमां बाहर औने दे धेइये दा प्रतीक ऐ।

<><><><><><>

## Myanmar-New Govt.

म्यांमार दी राष्ट्रीय रक्षा ते सुरक्षा परिषद-एनडीएससी नै अज्ज नमीं संघीय सरकार ते राज्य सुरक्षा ते शांति आयोग दा गठन कीता। म्यांमार रेडियो ते टेलीविजन मूजब संघीय सरकार दा नेतृत्व प्रधानमंत्री यून्यो साव करा रदे हे ते राज्य सुरक्षा ते शांति आयोग दे अध्यक्ष वरिष्ठ जनरल मिन आंग हलाइंग न। एन.डी.एस.सी नै रक्षा सेवाएं दे कमांडर-इन-चीफ गी सम्प्रभु शक्ति हस्तांतरित करने दे आदेश गी बी रद्द करने दा फैसला लैता। म्यांमार दी राज्य प्रशासन परिषद दे प्रवक्ता जाँ मिन टुन होरें आखेआ जे एन.डी.एस.सी नै आम चुना कराने आस्तै आपातकाल समाप्त करने दा फैसला लैता ऐ। फरवरी 2021 च म्यांमार च म्यांमार दे साबका कार्यवाहक राष्ट्रपति होरें इक्क ब'रे आस्तै आपातकाल दी घोषणा कीती ही ते रक्षा सेवाएं दे कमांडर-इन-चीफ गी सम्प्रभु शक्ति हस्तांतरित कीती ही।

<><><><><><>